



Un bishita di bombero na biblioteca

ORANJESTAD - Recientemente empleadonan di Biblioteca Nacional Aruba a haya hopi informacion tocante prevencion di candela for di sr. Osmar Lake, funcionario na Cuerpo di Bombero.

Riba invitacion di gerente di biblioteca sr. Osmar Lake a duna un presentacion tocante e tema importante aki. Como cu sr. Osmar Lake ta baha cu pensioen e siman aki, despues di 35 aña di servicio, a dicidi di filma e presentacion di sr. Lake pa asina e keda bon documenta. Empleadonan di biblioteca a haya informacion practico y util con pa preveni cualkier emergencia na biblioteca y con pa evacua publico si tin

mester. sr. Lake a duna explicacion di e pasonan cu mester tuma ora algo sosode, e yamada pa 911, detectornan di humo, e alarma, instalacion di porta y bentana, uzo di salida di emergencia, kico hende ta haci fout ora cu tin panico.

Sr. Lake a duna conseho pa diferente situacion peligroso cu por surgi tanto na trabou como na cas. Sr. Lake a haci esaki na un manera interactivo y humoristico, estimulando asina tur hende pa participa na e intercambio di informacion. sr. Lake a duna conseho na staf y personal di biblioteca pa traha riba un plan di evacuacion pa un emergencia y a conseha gerente pa laga empleadonan practica regularmente. Ora cu e alarma

ta zona empleadonan mester reacciona mesora y sigur.

Pa sorpresa di e empleadonan na final di e presentacion mester a 'simula' un evacuacion.

E sirena di brandweer a pone tur hende core sali pafo. Bomberonan a baha for di truck y a saca e brandspuit, cla pa paga candela, asina simulando un reaccion riba un yamada di emergencia. Esaki tabata un bon demostracion pa mehora e seguridad contra candela na biblioteca. Den number di staf y personal di biblioteca nos kier a gradici Cuerpo di Bombero y Rescate Nacional, sr. Kelly y Lake, pa e presentacion y na mesun momento desea sr. Lake pabien cu su pensioen y exito den futuro. □